

BAB IV

FAKTOR PERKEMBANGAN DAN KEMEROSOTAN KERAJAAN-KERAJAAN ISLAM DI ACEH

BAB IV

FAKTOR PERKEMBANGAN DAN KEMEROSOTAN KERAJAAN-KERAJAAN ISLAM DI ACEH

4. 1. Faktor Perkembangan Kerajaan Sebelum Aceh Darussalam

Sebuah tamadun bangsa samada di zaman moden ataupun zaman klasik tidak terlepas dari peristiwa muncul dan tenggelam. Ia tidak muncul serta merta lalu mencapai tahap kebesaran yang gemilang. Sebuah kerajaan sebelum mencapai puncak kejayaan, ia mesti melalui beberapa proses yang berliku-liku. Ada kerajaan yang dari permulaan kemunculannya tidak pernah mengalami kemerosotan tetapi stabil sampai ke kemuncaknya. Sebagai contoh beberapa tamadun besar di dunia, seperti tamadun China, Arab dan lain-lain.

Terdapat kerajaan yang sejak dari kemunculannya telah mengalami pelbagai peristiwa sehingga membawa kepada kemerosotan dan berakhir dengan keruntuhan. Oleh itu, sejarah telah mencatat berapa banyak tamadun bangsa yang sudah hilang. Hari ini ia tidak pernah muncul lagi seperti dahulu bahkan hilang sama sekali berganti dengan tamadun yang lain. Contohnya kerajaan Islam Cardova di Spanyol, Bani Zin-Nun di Teledo, 'Amiriyah di Valencia dan lain-lain. Ini disebabkan komuniti mereka telah tiada dan pupus, ia hanya tinggal sejarah semata.

Ibnu Khaldun dalam kitab *Muqaddimahnya* menyebutkan” bahawa sebuah tamadun akan melalui tiga proses penting, iaitu: *Badawah, Tadahhur,*

*Tahazzur.*¹ Peringkat pertama ini disebut masa permulaannya sebuah tamadun. Ia dimulai dengan bagaimana lahir tamadun itu. Tahap kedua ia memasuki masa perkembangan, sedangkan proses kemajuan sebuah tamadun berada pada tahap ketiga. Konsep ini, beliau berpedoman kepada keterangan Quran Surah Al-Imran Ayat 140:

وَتَلْكَ الِأَيَّامُ تُدَاوِلُهَا بَيْنَ النَّاسِ

Maksudnya: Dan masa (kejadian dan kehancuran itu), Kami pergilirkan di antara manusia (agar mereka mendapat pelajaran);
Terjemahan Surah 'Ali Imran: 2(140).²

Ayat tersebut seolah-olah telah membenarkan teori Ibnu Khaldun di atas. Ini dapat dibuktikan dengan realiti kerajaan-kerajaan yang lahir di masa lalu, kemudiannya ia tenggelam. Pasang surutnya sebuah kerajaan di dunia tentu mempunyai faktor-faktor tertentu.

Pembahasan tentang kerajaan Islam di Aceh yang telah menjadi sejarah penting bagi bangsa Melayu ribuan tahun yang lalu, dijumpai telah mengalami proses kemerosotan dan kemajuan. Untuk melihat faktor-faktor yang menjadi pendorong kepada kemajuannya, sehingga dikenal sebagai sebuah tamadun Islam yang teragong di Nusantara pada masa kebesarannya suatu ketika dahulu, maka analisis ini dibahagi dalam dua pembahasan. Pertama faktor kemajuan kerajaan-kerajaan Islam yang sebelum kerajaan Aceh Darussalam. Kedua faktor kemajuan kerajaan Aceh Darussalam sendiri.

¹ Ibnu Khaldun (1993), *Muqaddimah Ibn Khaldūn*. Beirut: Dār al-Kutub al-Islāmiyyah, h. 170. Lihat. Syauqi Abū Khalīl (1993), *Al-Haqqārāt al-'Arabiyah al-Islāmiyyah*. Libia: Kulliyah Dakwat al-Islāmiyyah, h. 29-32

² Jabatan Kemajuan Islam Malaysia (2000), *Tafsir Pimpinan Ar-Rahman Kepada Pengertian Al Quran (30) Juz*, Cet. 13. Kuala Lumpur: Dārul Fikir, h. 126.

Setelah semua data dianalisis tentang kerajaan Islam di Aceh yang pernah lahir sebelum Aceh Darussalam dikesan beberapa faktor penting yang mendorong kepada kemajuannya. Perlu ditegaskan di sini bahawa yang dimaksud dengan kerajaan Islam sebelum Aceh Darussalam adalah kerajaan Islam Perlak yang terletak di Bandar Khalifah, Aceh Timur, kerajaan Islam Pasai lokasinya di Gedoung, Aceh Utara, kerajaan Islam Taimiang di Aceh Timur, kerajaan Islam Daya di Lamno, Aceh Barat, kerajaan Islam Pidier di Aceh Pidie, kerajaan Islam Isak dan Lingga di Takengon, Aceh Tengah.

Kesemua kerajaan Islam tersebut pernah mencapai kemajuan dan kejayaanya. Unsur kemajuan itu menjadi penyumbang kepada kebesaran kerajaan-kerajaan yang lahir setelahnya. Samada kerajaan di Aceh ataupun kerajaan di sekitarnya. Adapun faktor-faktor yang mendorong kepada kemajuannya sebagai berikut:

- a. Faktor Agama
- b. Faktor Pendidikan
- c. Faktor Ekonomi
- d. Faktor Perkahwinan
- e. Faktor Politik

i. Faktor Agama

Faktor agama yang dimaksud di sini ialah Islam. Sesuai dengan fitrah Islam itu sendiri iaitu suatu agama yang dinamik, telah mampu merubah serta

membentuk masyarakat yang dinamik pula. Ini terbukti bahawa sebelum kedatangan Islam ke Perlak Aceh Timur, masyarakat di situ masih dengan kehidupan primitif.³ Ini diakui oleh beberapa ahli sejarah yang pernah berkunjung ke Perlak.⁴ Islam dengan nilainya yang suci telah mampu membentuk masyarakat Aceh yang membangun dan berkembang.

Sebelum kedatangan Islam sudah terdapat agama Hindu, Budha dan lain-lain di Aceh. Namun ia tidak mampu membebaskan masyarakat dari keterikatannya dengan kehidupan yang primitif. Faktor agama dapat diklarifikasi sebagai faktor utama dalam kemajuan setiap kerajaan Islam di Aceh. Ciri-ciri Islam yang membawa kedamaian dan kebebasan, ia mudah diterima oleh masyarakat Perlak, Pasai, hingga ke seluruh Aceh. Dengan Islam, mereka telah menemukan identitinya. Mereka tidak lagi hidup dengan hukum rimba. Dengan Islam mereka hidup setarap dan saling hormat menghormati.

Dari sudut lain, Islam memiliki nilai karisma yang datang langsung dari Allah SWT, dengan ini ia mampu merubah sebuah kerajaan menjadi kerajaan Islam hanya kerana faktor Islam itu sendiri. Sebaliknya jarang sekali dijumpai nilai karisma pada agama selain Islam yang mampu merubah sebuah kerajaan menjadi kerajaan agama selain Islam misalnya menjadi kerajaan Kristien. Ini menunjukkan bahawa agama lain tidak memiliki nilai karisma dan tidak sedinamik agama Islam yang dapat dengan mudah diterima oleh masyarakat.

³ Marco Polo (1939), *The Description of the world*. London: George Routledge and Sons, h. 370-371

⁴ *Ibid.*

Pertukaran Bandar Perlak kepada Bandar Khalifah hanya kerana ia identik dengan Islam semata. Kerajaan Taimiang yang lahir menjadi sebuah kerajaan Islam adalah hasil evolusi dari kerajaan Islam Perlak. Kerajaan Hindu/Budha Pidier bertukar menjadi kerajaan Islam Pidier sekitar abad 14 M juga kerana Islam. Sama halnya dengan pertukaran nama Raja Pasai Meurah Silu kepada gelar Malik al-Saleh kerana ianya gelaran seorang pahlawan Islam di Mesir yang sedang berjuang menentang perang Salib ketika itu. Ini menjadi bukti kepada kekuatan Islam itu sendiri dan begitu kental dalam jiwa rakyat Aceh.

Dalam waktu singkat Islam telah berkembang dari Timur hingga ke Barat, dari Utara hingga ke Selatan wilayah Aceh. Bahkan pada saat kerajaan Islam Pasai sahaja banyak pendakwah-pendakwah Islam menyebarkan Islam ke luar Aceh, ke pulau Jawa, Sumatera, Moro Selatan Filipina, Semenanjung Tanah Melayu, dan juga ke Patani Selantan Thailand. Oleh yang demikian, semua ahli sejarah sepakat bahawa kerajaan Islam pertama di Nusantara ialah di Aceh iaitu kerajaan Islam Perlak Aceh Timur.⁵

ii. Faktor Pendidikan

Latar belakang terkenalnya kerajaan-kerajaan Islam di Aceh selain faktor agama ialah faktor pendidikan dan ilmu pengetahuan. Misalnya kemajuan kerajaan Islam Perlak sebelum Pasai ialah disebabkan institusi pendidikan di Perlak yang mampu melahirkan sarjana-sarjana Islam. Dapat dibuktikan sebagai

⁵ Hasan Muhammad Ambary (1980), "Mencari jejak Kerajaan Islam Tertua di Indonesia (Perlak)" (Kertas Seminar Sejarah Masuk dan Berkembangnya Islam di Aceh dan Nusantara, di Aceh Timur, 25-30 Sepetember 1980), h. 1-7. Lihat. Team Sejarah A. Timur (1980), "Masuknya Islam di Perlak Aceh Timur dan Perkembangannya" (Kertas Seminar Sejarah Masuk dan Berkembangnya Islam di Aceh dan Nusantara, di Aceh Timur, 25-30 September 1980), h. 1-12.

contoh institusi pendidikan Zawiyah⁶ Bukit Cibrek dan Zawiyah Cot Kala Perlak keduanya dikatogerikan sebagai lembaga pendidikan Islam tertua Asia Tenggara.⁷

Zawiyah Cot Kala yang ditubuhkan tahun 899 M iaitu masa pemerintahan Sultan Sayyid Maulana Abbas Syah (888-913) telah melahirkan ulama'-ulama' besar menurut zaman itu. Antaranya Syeikh Abdullah Kan'an seorang ulama' sekaligus pahlawan yang membawa Islam ke Indra Purba Aceh Besar adalah lulusan Cot Kala. Malah salah seorang alumni Zawiyah Cot Kala pernah menjadi Sultan Perlak. Srikandi Perlak, Puteri Nurul 'Ala yang pernah memegang jawatan menteri kewangan kerajaan juga salah seorang dari alumni Cot Kala.⁸

Kebesaran kerajaan Pasai pula, terkenal kerana ia menjadi pusat ilmu pengetahuan. Fakta sejarah telah merekodkan dengan banyaknya kedatangan ulama' luar negari ke Pasai. Pelajar-pelajar dari pelbagai daerah termasuk dari Semenanjung Tanah Melayu berdatangan ke Pasai waktu itu. Kerajaan Pasai bukan hanya institusi Dayah⁹ yang menjadi pusat ilmu pengetahuan tetapi juga istana kerajaan turut dijadikan sebagai tempat berkumpul para ulama' dan hukama. Selain itu, pembesar-pembesar kerajaan yang menguasai pengetahuan dunia dan akhirat menjadi pendorong kuat kepada kemajuan Pasai.

⁶ Zawiyah bermaksud sudut ruang rumah yang dijadikan sebagai tempat pengajian. Zawiyah dalam dailek Aceh berubah menjadi Dayah.

⁷ Tgk. M. Arifin Amin *et al.* (1980), "Uraian Sekitar Kerajaan Islam Peureulak Aceh Timur", (*Kertas Seminar Sejarah Masuk dan Berkembangnya Islam di Aceh dan Nusantara, di Aceh Timur, 25-30 Sepetember 1980*), h. 72-74.

⁸ *Ibid.*

⁹ Dayah maksudnya Pondok/Pesantren.

Peranan istana kerajaan sebagai institusi pendidikan di Aceh telah mula dipraktikkan sejak dari kerajaan Perlak lagi. Misalnya istana kerajaan Perlak memainkan peranan penting dalam memberikan pendidikan kepada Sultan Abdul Aziz Syah sejak beliau masih kecil. Malah terdapat ahli sejarah Thomas W. Arnold¹⁰ dan Ibnu Batutah¹¹ yang menjelaskan secara khas tentang suasana istana Pasai pada masa Sultan Malik al-Zahir yang dijadikan sebagai institusi muzakarah berbagai disiplin ilmu pengetahuan.

Kerajaan Islam Melaka menjadikan Pasai sebagai tempat rujukan dalam bidang keagamaan dan sistem pentadbiran. Sehingga pengaruh Pasai sangat banyak dijumpai dalam sistem pentadbiran Melaka. Pada masa Sultan Mansur Shah Melaka (1456-1477 M), mengirim kitab "Dar al-Mazlum" karangan Abu Ishak al-Syirazi ke Pasai untuk diterjemah dan diberiuraian di sana.¹² Ulama' Pasai yang bertanggung jawab dalam hal ini adalah Makhdum Patakan.¹³

Selanjutnya Sultan Melaka sekali lagi mengirim Tun Bija Wangsa untuk meminta fatwa Pasai tentang hukum mengenai tuahid iaitu apakah penghuni syurga dan neraka kekal untuk selama-lamanya?¹⁴ Ulama' Pasai memberikan jawapan bahawa penghuni neraka akhirnya akan mengalami kehidupan senang di

¹⁰ Thomas W. Arnold (198), *Dakwah Kepada Islam* (terj). Jakarta: Penerbit Widjaya Jakarta, h. 321.

¹¹ Ibnu Batutah (1966), *Pelayaran Ibnu Batutah* (terj). Mesir: t.t.p, h. 409.

¹² Abdullah Ishak (1990), *Islam Di Nusantara: Khusus nya Di Tanah Melayu*. Kuala Lumpur: Badan Dakwah Dan Kebajikan Malaysia, h. 94. Lihat, *Sejarah Melayu*, h. 168-173. Ahmad Daudy (1983), *Allah Dan Manusia dalam Konsep Syeikh Nuruddin ar-Raniry*. Jakarta: CV. Rajawali, h. 28.

¹³ *Sejarah Melayu*, h. 114-118. Lihat, Mahyudin Hj Yahya (t.t), *Sejarah Perkembangan Pemikiran Islam Dalam Konteks Alam Melayu: Iktibar Untuk Abad Akan Datang*. Malaysia: Jabatan Sejarah Universiti Kebangsaan Malaysia, h. 75.

¹⁴ R.A. Nicholson (1967), *Studies In Islamic Mysticism*. Cambridge, h. 136-137

dalamnya. Jawapan ini telah dapat menyelesaikan masalah tersebut dan menyenangkan hati Sultan Melaka. Semua ini, menunjukkan bahawa terkenalnya kerajaan Pasai ialah kerana pendidikan dan ilmu pengetahuan.

Faktor pendidikan sangat menentukan corak perkembangan sesebuah tamadun. Dengan demikian kerajaan Pasai dikenali sebagai pusat tamadun Islam di Nusantara setelah Perlak. Semakin maju kualiti pendidikan dan pengetahuan, kerajaan semakin maju dan matang. Faktor pendidikan dan ilmu pengetahuan bukan hanya ukuran kepada tamadun di dunia, melainkan individu pula dengan ilmu pengetahuan ia akan jadi mulia.

Adapun sumbangan tokoh-tokoh ulama' dan intelektual kerajaan sebelum Aceh Darussalam lebih kepada sumbangan perjuangan menyiaran Islam dan ilmu pengetahuan, seperti Syeikh Abdullah Kan'an menjadi pimpinan Zawiyah Cot Kala Perlak, Syeikh Sirajuddin menyiaran Islam ke Aceh Tengah, dan lain-lain. Sedangkan sumbangan dalam bentuk tulisan sedikit dijumpai. Dapat disebutkan di sini antaranya; Kitab *Idharul Haq fī Mamlakatil Perlak* karangan Abu Ishak al-Makarani al-Pasy, kitab *Tazkiratul Tabaqāt Jumū` Sultan al-Salāṭīn* karangan Syeikh Syamsul Bahri Abdullah Al-Asyi, *Silsilah Raja-Raja Perlak Dan Pasai* karangan Sayyid Abdullah Ibn Sayyid Habib Saifuddin. Hikayat Putri Nurul 'Akla, Hikayat Banta Beuransah.¹⁵

¹⁵ A. Hasyimi et al. (1980), "Sejarah Kerajaan Islam Perlak" (Kertas Kerja Seminar Sejarah Masuk Dan Berkembangnya Di Aceh Dan Nusantara, di Aceh Timur, 25-30 September 1980), h. 1-2.

iii. Faktor Ekonomi

Kerajaan akan jadi kuat dengan kuatnya ekonomi. Politik akan stabil apabila sumber ekonomi kerajaan kuat. Dapat dikatakan faktor ekonomi dan politik berkaitan erat. Ia tidak boleh dipisahkan antara satu dengan yang lain. Sumber ekonomi Perlak banyak bersumberkan dari hasil pertanian seperti lada, rotan, kapor barus, kemenyan, gading, dan sutera. Selain itu terdapat juga lombong emas yang berpusat di “*Alue Meuh*”.¹⁶ Hasil-hasil tersebut dieksport ke luar negeri antaranya ke China, Asia Barat dan Eropah.¹⁷

Namun demikian yang menjadi nadi penggerak kelancaran perekonomian Perlak adalah sektor perdagangan. Pengakuan Marcopolo bahawa Perlak sering dikunjungi oleh saudagar-saudagar Muslim menjadi bukti bahawa sumber ekonomi Perlak adalah perdagangan yang mana Perlak memiliki pelabuhan yang strategik iaitu pelabuhan Kuala Perlak yang terkenal sampai ke hari ini.

Sementara yang menjadi sumber ekonomi kerajaan Pidier antaranya padi, daging, anggur, ikan, sutera putih, lada, dan emas. Sumber-sumber ini dieksport ke Pegu, Bengal, Kedah, dan lain-lain.¹⁸ Yang menjadi hubungan dagang utama kerajaan Pidier ketika itu adalah China dan India. Adapun yang menjadi pelabuhan utama dan strategik di kawasan Pidier ialah pelabuhan Kuala Bate dan pelabuhan Kuala Ulim.

¹⁶ Arifin Amin (1980), *op.cit.*, h. 32.

¹⁷ A. Hasyimi (1980), *op.cit.*, h. 25.

¹⁸ Uka Tjandra Sasmitro (1980), “Proses Kedatangan Islam Dan Munculnya Kerajaan-kerajaan Islam di Aceh”, (Kertas kerja Seminar Sejarah Masuk Dan Berkembangnya Islam Di Aceh Nusantara, di Aceh Timur, 25-30 September 1980), h. 7.

Adapun pada masa kerajaan Pasai, pelabuhannya menjadi sumber utama bagi ekonomi kerajaan. Dengan memiliki pelabuhan yang strategik banyak pedagang-pedagang Islam yang datang dari pelbagai negara di dunia singgah di Pasai. Pelabuhan Pasai menjadi pelabuhan antarabangsa, dan negeri Pasai menjadi pusat perdagangan bilateral. Pada masa itu Pasai tidak banyak memiliki hasil bumi sebagai aset ekonomi. Namun sektor pertanian merupakan sumber ekonomi kedua kerajaan itu, antaranya lada yang dieksport ke Turki, Arab, Persia, Malaya, Jawa, dan Siam.¹⁹

Kemakmuran Pasai telah disaksikan oleh Ibnu Batutah, dan Marcopolo ketika mereka berkunjung ke Pasai. Marcopolo menceritakan tentang kesibukan pelabuhan Pasai di mana kapal-kapal dagang dari berbagai negara di dunia berlabuh di pelabuhan Pasai. Dalam buku *Tarich Atjeh dan Nusantara* dinyatakan bahawa di Pasai selain mata wang rasmi kerajaan juga dijumpai beberapa mata wang asing yang menjadi alat tukar di pasar perdagangan dalam negeri.²⁰

iv. Faktor Perkahwinan

Sistem perkahwinan ini disebut juga sistem persemandian. Ia merupakan salah satu unsur politik kerajaan-kerajaan Islam di Aceh. Namun unsur politik ini tidak sama dengan dasar politik luar yang dijalankan oleh kebanyakan negara pada hari ini. Sebenarnya faktor ini kurang diberi perhatian oleh penganalisis sejarah dalam konsep kemajuan sesebuah kerajaan. Tetapi kenyataannya teori tersebut sangat banyak pengaruhnya dalam kemajuan kerajaan Islam di Aceh. Ini

¹⁹ *Ibid.*, h. 8.

²⁰ H. Zainuddin (1961), *Tarich Atjeh dan Nusantara*. Medan: Pustaka Iskandar Muda, h. 71-74.

telah dimulai sejak berdirinya kerajaan Islam Perlak lagi, di mana yang menjadi Sultan Perlak pertama iaitu Sultan 'Abdul Aziz Syah ialah keturunan campuran antara bangsawan Perlak dan bangsawan Qurasy yang datang dari tanah Arab.

Meskipun kemajuan utama yang diharapkan dengan teori ini ialah menyiaran Islam ke seluruh wilayah Aceh dan sekitarnya. Selari dengan misi itu, ia juga telah membawa kemajuan kepada kerajaan dalam pelbagai bidang seperti ekonomi, politik dan sebagainya. Oleh kerana itu ahli sejarah menamakan sistem ini dengan perkahwinan politik. Sebagai contoh perkahwinan Meurah Johan dari Perlak dengan Puteri Nian Nion Liang Khi dari kerajaan Indra Purwa, Aceh Besar yang ditakluknya.²¹ Dengan perkahwinan itu, semua rakyat yang di bawah pimpinan Ratu Nian Nion masuk Islam.

Ini merupakan suatu peristiwa yang luar biasa dalam kemajuan kerajaan Perlak. Begitu juga, perkahwinan antara Puteri Pasai dengan Raja Melaka. Dengan ini, hubungan politik kedua-dua kerajaan semakin kukuh. Sultan Mali al-Saleh mengawini Puteri kerajaan Perlak telah menjadi faktor kepada kebesaran kerajaan Pasai. Tidak lama setelah kedua kerajaan terikat dengan teori perkahwinan ini, kerajaan Perlak menjadi federasi di bawah kerajaan Pasai.²² Kerajaan bertambah besar, kuat dan maju dalam pelbagai bidang.

Keberkesanan teori perkahwinan ini telah menjadi bukti apabila kerabat kerajaan yang berpindah kepada suatu daerah, dan kahwin dengan orang

²¹ Arifin Amin *et al.* (1980), *Uraian Sekitar Kerajaan Islam Perlak*, h. 30.

²² Wan Husein Azmi (1993), "Islam di Aceh Masuk Dan Berkembangnya Hingga Abad XVI", dalam A. Hasyimi *et al.* (ed), *Sejarah Masuk dan Berkembangnya Islam di Indonesia*. Bandung: P.T. Alma'ani, h. 201.

tempatan, dengan demikian ia dapat mendirikan sebuah kerajaan Islam yang baru. Kerajaan Benua Taimiang misalnya, pendirinya adalah Meurah Perlak yang kahwin dengan anak tempatan.²³ Hal yang sama berlaku berkaitan dengan penubuhan kerajaan Islam Daya, dan kerajaan-kerajaan kecil lainnya di wilayah Aceh. Banyak intelektual asing menjadi orang besar dalam kerajaan Islam di Aceh seperti di Pasai kerana mereka telah kahwin dengan orang tempatan.

Oleh kerana itu, sistem persemandian ini menjadi faktor kepada kemajuan kerajaan Islam di Aceh. Fakta sejarah menyatakan bahawa di Aceh terdapat ulama' besar yang datang dari luar Aceh seperti dari Arab, Parsi, India dan lain-lain, lalu terkenal sebagai ulama' besar Aceh ialah disebabkan kesan teori tersebut. Ia berkesan bukan setakat pada masa sebelum kerajaan Aceh Darussalam, bahkan pada masanya pun masih menjadi faktor pendorong kepada kemajuan kerajaan. Dengan itu kedudukan kerajaan semakin luas dan kerjasama politik semakin erat dan kuat.

Semua faktor yang membawa kepada kemajuan kerajaan Perlak dan Pasai, juga menjadi faktor bagi kemajuan kerajaan Islam lainnya di Aceh, seperti kerajaan Taimiang, Pidier, Daya, Isak dan Lingga. Kerajaan yang lahir sesudah Perlak, ia lebih banyak pengaruh Perlak, seperti dalam kerajaan Islam Tamiang. Sedangkan kerajaan Islam yang muncul sedikit setelah Pasai, ia lebih banyak dipengaruhi oleh Pasai dari segi faktor kemajuan. Dapat dikatakan di sini, bahawa kerajaan Islam di Aceh yang kemunculannya sekitar Perlak dan Pasai, tentu sahaja dalam faktor kemajuannya dipengaruhi oleh kedua kerajaan ini. Faktor agama,

²³ Arifin Amin (1980), *op.cit.*

ekonomi, pendidikan dan teori persemandian saling berkaitan setiap perkembangan kerajaan tersebut.

v. Faktor Politik

Hakikatnya bahawa nilai sebuah tamadun bangsa ialah pada corak politiknya. Apabila politik stabil kerajaan pun akan berkembang dan maju, begitu juga sebaliknya. Di Aceh, semua kerajaan Islam sebelum kerajaan Aceh Darussalam mempunyai hubungan politik dan diplomatik dengan semua kerajaan yang lahir semasanya. Misalnya hubungan kerjasama dan saling bantu membantu antara satu sama lain, antaranya ketika Perlak diserang oleh Sriwijaya, kerajaan Pasai memberikan bantuan ketenteraan. Ketika kerajaan Taimiang diserang oleh Majapahit, Perlak dan Pasai dengan segera membantu. Begitu juga dengan kerajaan yang semasa dengan Perlak dan Pasai.

Dasar pembinaan politik kerajaan-kerajaan ini berdasarkan atas Islam. Ertinya politik atas dasar kesatuan akidah dan agama. Bermula dari sistem pemerintahan Perlak yang banyak persamaan dengan sistem pemerintahan Islam di Baghdad hingga kepada dasar luarnya. Hubungan erat dengan kerajaan jiran dan luar negeri seperti dengan Arab, China, Parsi dan lain-lain berlandaskan politik agama. Secara politik kerajaan akan membantu saudaranya yang seakidah dengannya dan tidak akan tunduk terhadap ancaman yang datang daripada kerajaan bukan Islam terhadap kerajaan Islam sekitarnya.

Ini dapat dibuktikan apabila Perlak tidak tunduk kepada Sriwijaya yang memintanya untuk membayar ufti. Begitu pula dengan Taimiang tidak bertolak ansur dengan Majapahit yang memintanya untuk menyerahkan seorang gadis sebagai sajian kepada Raja Majapahit. Mereka lebih rela mati daripada tunduk kepada kuasa yang bukan Islam. Ini menunjukkan kekuatan politik Islam dalam setiap kerajaan sebelum Aceh Darussalam begitu mendalam, sehingga ia menjadi faktor yang mendorong kepada kemajuannya.

4.2. Faktor Kemerosotan Kerajaan Sebelum Aceh Darussalam

Setelah ratusan tahun kerajaan-kerajaan Islam tersebut merentangi sejarah kemajuan dan telah memberikan sumbangan yang besar bagi terwujudnya sebuah tamadun Islam yang lebih matang setelah kemunculannya. Namun selain daripada kejayaan dan kemajuan, ia tidak terlepas dari faktor yang menyebabkan kepada kemerosotannya. Adapun yang menjadi skop analisis tentang faktor kemerosotan kerajaan tersebut mencakupi kerajaan Islam Perlak tahun 225 H/840 M, hingga tahun 916 H/1511 M iaitu masa dideklarasikan berdirinya kerajaan Aceh Darussalam.

Berdasarkan kepada perjalanan sejarah yang begitu panjang, sebagai mana yang telah dijelaskan pada Bab III, dapat ditemukan beberapa faktor yang menyebabkan kepada kemerosotan kerajaan-kerajaan tersebut. Penemuan ini sekaligus memberikan jawapan bagi soalan apakah penyebabnya kerajaan-kerajaan tersebut merosot setelah kejayaannya. Di bawah ini dijelaskan sebab-sebab tersebut seperti berikut:

- a. Perpecahan Politik Dalam
- b. Ancaman Pihak Asing

i. Perpecahan Politik Dalam

Kestabilan politik sesebuah negara adalah salah satu faktor yang menjadikan negara itu maju. Maka perpecahan politik suatu negara pula akan menyebabkan negara tersebut lemah. Sebenarnya perpecahan politik dalam bukan berpunca dari masalah yang begitu besar. Kadang-kadang konflik itu terjadi hanya disebabkan masalah kecil. Misalnya penyebab kemerosotan kerajaan Perlak sehingga pecah menjadi kepada dua bahagian hanya kerana sentimen dua aliran. Kedua aliran yang dimaksud adalah aliran Syi'ah yang diwakili oleh Said Maulana dan aliran Ahlusunnah yang diwakili oleh keturunan Meurah Perlak.²⁴

Berpunca dari fahaman ini menyebabkan berlaku konflik dalam kerajaan. Dengan konflik ini situasi politik kerajaan menjadi tegang. Bahkan menurut analisis sejarah sempat terjadi perang saudara antara pengikut fahaman ahlusunnah dan fahaman Syi'ah. Masing-masing aliran merasa berhak untuk memimpin kerajaan. Pihak Syi'ah berpendapat mereka lah yang berhak ke atasnya kerajaan keturunan mereka yang telah berjasa mendirikan kerajaan Perlak. Ahlusunnah pula yang diwakili oleh keturunan Meurah berpendapat lebih layak memerintah kerajaan kerana mereka lah pewaris sah kerajaan Perlak.²⁵

²⁴ *Ibid.*

²⁵ *Ibid.*

Untuk menyelesaikan konflik berkepanjangan tersebut beberapa siri rundingan damai dijalankan, namun ia gagal. Akhirnya kerajaan Perlak terpaksa dibahagi menjadi dua bahagian. Pertama Perlak bahagian pesisir yang diperintah oleh Said Maulana dengan ibukotanya Bandar Khalifah. Kedua Perlak bahagian pedalaman yang diperintah oleh Makhдум Meurah Abdul Kadir Syah dengan pusat pemerintahannya Bandar Tualang. Reputasi kerajaan Perlak terus merosot disebabkan oleh perpecahan politik dalaman. Meskipun kemudiannya ia dapat dipersatukan kembali, namun ia berjalan dengan kondisi politik yang lemah.

Kerajaan Islam Taimiang yang juga berada dalam wilayah Aceh Timur, mengalami hal yang sama. Setelah Muda Sedia meninggal dunia pada tahun 800 H/1398 M para pembesar kerajaan saling memperebutkan kekuasaan.²⁶ Krisis politik dalaman ini juga membawa kepada perpecahan. Kerajaan Islam Taimiang pula terpaksa dipecahkan kepada beberapa kerajaan kecil. Antaranya yang direkod oleh sejarah ialah kerajaan Karang Taimiang, kerajaan Indra Tamiang.²⁷ Akibat dari itu, menyebabkan kerajaan Islam Taimiang itu lemah.

Pada masa Pasai diperintah oleh Sultan Zainal 'Abidin Malik al-Zahir (750-796 H/1350-1394 M) berlaku konflik antara Panglima perang kerajaan dengan Sultan.²⁸ Peristiwa ini bermula apabila Sultan tidak menghargai jasa Panglima perang Laksamana Nagur Rabbat Abdul Qadir Syah yang telah berjasa mempertahankan Pasai dari serangan Majapahit. Oleh itu, terjadilah perpecahan

²⁶ Mahmunar Rasyid *et al.* (1980), "Mencari jejak awal Perkembangan Islam di Taimiang Aceh Timur" (Kertas Seminar sejarah Masuk Dan Berkembangnya Islam Di Aceh Dan Nusantara, di Aceh Timur, 25-30 September 1980), h. 7-12. Lihat, M. Yunus Djamil (1968), *Tawarich Raja-raja Kerajaan Atjeh*. Banda Aceh: Ajdam Iskandar Muda, h. 18-24.

²⁷ Yunus Djamil (1968), *Tawarich Raja-raja Keradjaan Atjeh*, h. 18.

²⁸ *Ibid.*, h. 16-17.

antara pengikut panglima Nagur dengan pengikut Sultan Zainal 'Abidin. Akhirnya Sultan Zainal 'Abidin meninggal dunia. Panglima Nagur naik tahta dengan gelar Maharaja Nagur Rabbat Abdul Qadir Syah.²⁹

Empat tahun berselang baginda pula dibunuh oleh Syahbandar Pasai Ariya Bakoy atas arahan Permaisuri janda Sutan Zainal 'Abidin. Maka tahta kerajaan digantikan oleh Puteri Sultan iaitu Puteri Nihrasiyah dengan gelar Malikah Nihrasiyah Rawangsa Chadiyu (801-831 H/ 1400-1428 M). Ariya Bakoy diangkat sebagai Mangkubumi. Situasi politik semakin panas apabila Ariya Bakoy bertelagah dengan ulama'-ulama' Pasai yang menentang kehendaknya iaitu ingin mengawini anak kandungnya sendiri. Kesudahan Ariya Bakoy dibunuh oleh Malik Mustafa suami kepada Ratu Nihrasiyah.³⁰

Akibat dari perpecahan politik yang berkepanjangan kerajaan Pasai tidak mampu lagi mengembalikan kebesarannya. Kesan negatif juga berlaku kepada kemelesetan ekonomi Pasai. Palabuhan Pasai semakin sepi, kapal-kapal dagang meninggalkan pelabuhan tersebut. Justru itu, faktor perpecahan politik dalam sebuah kerajaan adalah faktor utama penyebab kemerosotan kerajaan. Perpecahan politik merupakan tanda tidak adanya perpaduan dan kesatuan, apabila persatuan sudah tidak ada lagi maka kemerosotan akan terjadi. Bukan hanya itu, malah ia akan dapat dikalahkan oleh orang lain.

²⁹ *Ibid.*

³⁰ *Ibid.*

'Ali r.a mengatakan.³¹

الْحَقُّ بِلَا نِظَامٍ يَعْلَمُ الْبَاطِلُ بِنِظَامٍ

Maksudnya: Kebenaran tanpa persatuan akan dikalahkan oleh kebatilan yang ada persatuan

ii. Ancaman Pihak Asing

Apabila sebuah kuasa politik dengan kedudukannya yang stabil, saat itu pula banyak yang datang menawarkan diri untuk menjalin hubungan persahabatan. Sebaliknya jika kondisi politik menjadi goyang, tidak aman, hubungan persahabatan satu persatu mula menjauhinya. Pada saat kerajaan telah lemah, ia menjadi kesempatan bagi kuasa-kuasa asing mengambil keuntungan. Sebagai mana telah disebutkan di atas bahawa perpecahan politik dalaman adalah salah satu penyebab kemerosotan kerajaan, dan ia juga membuka pintu kepada pihak asing untuk mengambil kesempatan.

Ancaman pihak asing adalah penyebab kedua terhadap kemerosotan kerajaan, samada ia datang pada saat krisis politik atau dalam keadaan stabil. Cuma ancaman pihak asing lebih cepat dan lebih buruk kesannya jika ia berlaku saat kerajaan dilanda konflik dalaman. Salah satu contoh ancaman Sriwijaya di Palembang ke atas kerajaan Islam Perlak ialah ketika Perlak sedang mengalami krisis politik. Peristiwa ini terjadi tahun 670 H/1271 M.³² Meskipun Sriwijaya tidak berhasil menawan kerajaan Perlak, tetapi kerajaan Islam tersebut mengalami kesulitan berganda. Walaupun secara psikologi rakyat Perlak tetap mempunyai

³¹ Muhammad Yusuf al-Kandahlawi (t.t), *Hayātu al-Sahābah*. Al-Qāhirah: Dār al-Rayyān, h. 324.

³² Arifin Amin (1980), *op.cit.*, h. 40. Lihat, A. Hasyimi (1993), *Sejarah Masuk Dan Berkembang Islam Di Indonesia*. Bandung: P.T Alma' arif, h. 200-201.

semangat jihad dan tidak merasa kalah, tetapi secara fizikal Perlak telah dilanda kemerosotan.

Ancaman Majapahit sebuah kerajaan Hindu Jawa terhadap kerajaan Islam Taimiang menyebabkan Taimiang hancur. Majapahit menyerang kerajaan Islam Taimiang atas alasan yang tidak masuk akal, dan bertentangan dengan ideologi rakyat Taimiang. Alasannya kerana Raja Taimiang menolak menyerahkan Puterinya untuk dijadikan sajian kepada Raja Majapahit.³³ Ibukota kerajaan Taimiang musnah menjadi abu dan pusat pemerintahannya lumpuh.

Ekoran peperangan dengan Majapahit, kerajaan Taimiang bukan hanya membawa kemerosotan tetapi ia hampir jatuh ke tangan musuh. Kerajaan Taimiang berusaha mendapatkan bantuan Perlak dan Pasai dan diharapkan dengan bantuan jirannya itu Taimiang akan bangun kembali, tetapi peperangan berkenaan telah membuatnya lemah. Kerajaan-kerajaan lain di Aceh seperti Daya, Pidier dan lain-lain, juga mengalami hal yang sama. Walaupun kesannya tidak seperti yang dihadapi oleh Perlak, Pasai, Taimiang, tetapi ancaman tersebut telah memberi dampak negatif dalam perkembangan politik kerajaan-kerajaan Islam yang ada di Aceh ketika itu.

4.3. Faktor Perkembangan Kerajaan Aceh Darussalam

Lembaran sejarah penuh dengan ukiran dan gambaran tentang kemajuan sebuah kerajaan yang terletak di hujung pulau Sumatera. Catatan sejarah apabila

³³ Mahmunar Rasyid (1980), *op.cit.*, h. 10-11. Lihat. Yunus Djamil (1968), *op.cit.*, h. 19-21.

menyebut kebesaran dan kemunduran kerajaan-kerajaan di Sumatera, maka yang dimaksud dengan kerajaan di Sumatera ialah kerajaan-kerajaan Islam yang pernah muncul di negeri Aceh. Apabila orang mengingat kembali kerajaan Aceh, yang terlintas dalam gambarannya ialah kerajaan Aceh Darussalam.

Tak ada yang menafikan bahawa Aceh Darussalam merupakan salah satu Pusat Tamadun Islam teragung di Alam Melayu pada masanya. Setelah kejatuhannya tidak ada lagi kerajaan Islam yang mampu mengembalikan kebesaran itu sampai menjelang abad 20-an. Perkembangannya yang telah mencapai puncak kejayaan di abad ke 16 sampai 18 menjadi tebusan terhadap kemunduran dan kekalahan bangsa Timur sebelumnya. Kegemilangannya adalah lanjutan dari perkembangan kerajaan-kerajaan yang telah sedia ada di Aceh.

Kerajaan ini mampu bertahan sampai berabad-abad lamanya. Penulis Barat menyebutkan bahawa *Kingdom of Acheen and Sumatra* adalah sebuah empayar yang paling berkuasa di Asia pada pertengahan abad ke 17.³⁴ Dalam pada itu, di sini disebutkan beberapa faktor yang mendorong kejayaan kerajaan tersebut, berdasarkan pada kajian data dan fakta yang telah dianalisis. Antaranya:

- a. Agama
- b. Politik
- c. Pusat Perdagangan dan Ekonomi
- d. Pusat Ilmu Pengetahuan dan Pendidikan
- e. Adat Istiadat

³⁴ C. Nooteboom (1950), *Sumatera dan Pelayaran di Samudra Hindia*, (terj). Jakarta: Bhratara, h. 119-127.

- f. Kerjasama Ulama dan Umara
 - g. Semangat Patriotisme
 - h. Pemerintahan Yang Adil
 - i. Kebebasan
 - j. Kesejahteraan
-
- i. Agama

Agama adalah cara hidup seseorang. Islam telah merubah kehidupan masyarakat Aceh. Nilai Islam telah memberikan kekuatan dan semangat hidup mereka. Islam telah meletakkan kerajaan Aceh Darussalam ke puncak kejayaannya. Atas dasar Islam mereka mampu melaksanakan konfrantasi terhadap penjajah asing. Ratusan tahun mereka sanggup bertempur melawan musuh ialah kerana kekuatan Islam. Mereka tidak takut berdepan maut demi mempertahankan Islam.³⁵

Bagi mereka tidak ada perundingan dengan penjajah. Bangsa Portugis, Belanda, Jepun, tidak ada satupun yang mampu mempengaruhi dan merubah semangat keislamannya. Mereka menyebut penjajah adalah *Kafei* (kafir). Haram hukumnya kompromi dengan kafir. Apabila kalimat *Kafei* dilabelkan ke atas seseorang di Aceh, ia akan terjadi pertengkaran yang fatal. Kerana sebutan *Kafei* kepada orang lain bermakna ia telah menganggap orang itu kafir.

³⁵ Amran zamzami (1990), *Jihad Akbar di Medan Area*. Jakarta: Gunung Agung, h. 121.Lihat, Ibrahim Alfian (1975), *Perang Di Jalan Allah*. Jakarta: Sinar Harapan, h. 53.

Tidak ada kehidupan bagi mereka kalau tanpa Islam. Islam bagi mereka adalah agama, politik, ekonomi, pendidikan, dan adat istiadat. Fanatik mereka terhadap Islam membuat mereka cukup marah apabila ada yang menghina Islam. Demi Islam mereka sanggup berkorban apa saja. Snouck Hurgronye seorang sarjana dan penasihat pemerintah Belanda terpaksa datang ke Mekkah untuk belajar Islam selama sepuluh tahun, dengan tujuan untuk dapat menundukkan rakyat Aceh dengan Islam. Malah dia menukar namanya kepada Abdul Ghaffar dan menyamar lalu menyusup ke Aceh.³⁶

Meskipun misinya tidak berhasil, namun kerana atas nama Islam banyak juga orang Aceh ketika itu yang terperangkap dengan taktik kotor Snouck Hurgronye. Bahkan disebabkan cita-cita mereka untuk Islam, mereka rela membantu orang lain, kerana tawaran bahawa akan dijadikan sebuah negara Islam yang besar yang berdasarkan atas hukum syariat. Namun Aceh tertipu, yang akhirnya menyebabkan kehilangan kedaulatanya.³⁷

Faktor agama termasuk faktor utama dalam proses perkembangan dan kemajuan kerajaan Aceh Darussalam. Oleh kerana itu, seluruh rakyat Aceh seratus peratus beragama Islam. Tidak ada agama lain selain Islam di Aceh. Semua unsur Hindu, Budha, Kristian telah dikikis habis pada masa kerajaan Aceh Darussalam. Kalaupun dijumpai agama selain Islam dalam masyarakat Aceh pada hari ini, maka kewujudannya hanya setelah dengan tidak jelas menjadi wilayah Republik Indonesia.

³⁶ Muhammad Said (1961) *Atjeh Sepanjang Abad*. Medan: Penerbit Waspada, h. 561-568.

³⁷ M. Kaoy Syah et al. (2000), *Keistimewaan Aceh Dalam Lintasan Sejarah: Proses Pembentukan UU No. 44/1999*. Jakarta: Pengurus Besar Al-Jami'iyatul Washliyah, h. 178.

ii. Politik

Ungkapan politik sering dikaitkan dengan sistem pemerintahan. Politik sebuah kerajaan dapat diertikan dengan sistem pemerintahan kerajaan tersebut. Kemajuan sesebuah kerajaan tidak terlepas dari sistem politik yang baik. Kerajaan Aceh Darussalam berkembang dan maju, juga disebabkan sistem politiknya yang kuat dan stabil. Maksud politik yang stabil ialah tidak berlaku perebutan kuasa dalam kerajaan. Kestabilan politik dan pemerintahan akan menjadi pendorong kepada kemajuan dalam sudut ekonomi kerajaan.

Kegemilang Aceh sebagai sebuah kuasa politik berada di tangan Iskandar Muda Mahkota Alam. Pada masanya seluruh aspek kehidupan rakyat Aceh terpenuhi. Rasa kebangsaan sebagai bangsa Aceh cukup kental, semangat seagama dan seakidah menjadi ideologinya, semangat jihad yang ditanam dalam setiap jiwa rakyatnya untuk menentang kuasa asing menjadi matlamatnya, menyebarkan Islam ke seluruh pelosok Nusantara dan memperbaiki dengan lebih baik sistem pendidikan adalah sebagai pegangannya.

Tidak hanya itu, menguasai sektor ekonomi dan perdagangan, meningkatkan kesejahteraan rakyatnya adalah cita-citanya serta meningkatkan sistem pertahanan negara menjadi keutamaannya. Dengan itu, rakyat Aceh menjadi bangsa yang besar iaitu bangsa Aceh di bawah satu berdera dan satu kedaulatan. Semua unsur-unsur ini menjadi satu kekuatan politik dalam Aceh yang menjadi faktor kepada kejayaan kerajaan Aceh Darussalam ketika itu.

Sistem politik sebuah bangsa bukan hanya menjamin ekonomi yang lebih baik, bahkan juga kualiti pendidikan bangsa. Selain itu, ia juga mampu meningkatkan taraf hidup rakyat yang sejahtera. Kontek politik kerajaan Aceh Darussalam juga meliputi dasar luarnya yang kuat. Pada permulaan abad ke 16, Aceh merupakan negara pertama yang mengiktiraf kedaulatan Belanda yang merdeka dari Sepanyol.³⁸

Pada masa pemerintahan Sultan 'Alaiddin Ri'atsyah al-Qahhar (1537-1568), hingga ke masa Sultan Iskandar Muda (1607-1636) Aceh telah menjalin hubungan diplomatik dan persahabatan terutama dengan kerajaan-kerajaan Islam seperti Turki, Mekkah, India dan lain-lain.³⁹ Pada masa jayanya Aceh juga diiktiraf menjadi salah satu negara lima besar Islam. Kerajaan Turki telah menghantar bantuan seramai 40 orang pakar senjata dan peralatan ketenteraan ke Aceh. Begitu juga dengan Mekkah yang mengirim ulama'-ulama' serta kitab-kitab agama.⁴⁰ Dengan ini Aceh dapat mengukuhkan lagi sistem politik dan pertahanannya

Satu lagi keberhasilan politik luar Aceh ialah menjalin hubungan persahabatan dengan kerajaan Inggeris. Satu perjanjian ditandatangani pada tahun 1819 M yang dikenal dengan "*Tractat London*". Salah satu antara butirannya ialah

³⁸ Muhammad Said (1961), *op.cit.*, h. 133. Lihat, Hasan Muhammad Di Tiro (1985), "The Case and the Cause of the National Liberation Front of Aceh-Sumatra", a presentation before The Scandinavian Association of Southeast Asian Social Studies, Goteborg, August, 1985, h. 5.

³⁹ DC. Hall (1960), *A History of South East Asia*. New York: Macmillan & Co Ltd, h. 199. Lihat, B. Schrieke (1960), *Indonesian Sosiological Studies*. Bandung: Sumur Bandung, h. 245.

⁴⁰ T. Iskandar (1960), *Nurdin Ar-Raniry, Bustan's Salatin*, Bab II, fasal 13. Kuala Lumpur: Dewan Pustaka dan Bahasa, h. 31.

bahawa Inggeris akan menjaga kedaulatan Aceh selamanya.⁴¹ Adapun dasar politik Aceh terhadap wilayah federasi di bawahnya tetap diberikan hak sewajarnya.

Meskipun dalam menjalankan polisi politiknya ke atas wilayah Sumatera dan Tanah Melayu terdapat agresif, seperti ekspedisinya ke Pasai dan Johor. Ini harus dilihat dari sudut yang lain, iaitu kerana Johor, Pasai membantu Portugis. Ia bukan kerena ingin mencetuskan perperangan dengan saudaranya yang seagama. Tetapi lebih kepada ancaman Portugis yang mengancam kestabilan Nusantara. Dengan dasar politiknya yang kuat dan dukungan moral pihak internasional Aceh mampu menjadi satu kuasa besar di Asia Tenggara pada masanya.

iii. Pusat Perdagangan dan Ekonomi

Kejatuhan Melaka ke tangan Portugis, membuka peluang kepada Aceh untuk muncul sebagai pusat perdagangan internasional. Tambahan lagi sikap diskriminasi Portugis yang menyebabkan pedagang-pedagang Islam bertumpu ke Aceh. Ramai para pedagang dari Arab, Turki, China, Eropah dan Nusantara mengadakan hubungan perdagangan dengan Aceh. Pelabuhan Banda Aceh menjadi entrepot terpenting menggantikan Melaka pada abad 16 sampai 17 M.⁴²

Kedudukan Aceh yang memiliki banyak pelabuhan dan berada di jalur perdagangan antarabangsa membuat Aceh begitu maju. Pada masa Sultan Iskandar Muda, seorang pedagang berbangsa Perancis Laksamana Augustin de

⁴¹ Nur El-Ibrahimy (1993), *Selangkah Langkah Diplomasi Kerajaan Aceh*. Jakarta: P.T. Gramedia Widiasarana, h. 12-19. Lihat, M. Said, *op.cit.*, h. 240-242.

⁴² Anthony Reid (1969), *The Contest For North Sumatra*. London: Oxford University Press, h. 2.

Beaulieu menceritakan dalam sebuah tulisannya yang telah diterjemahkan ke dalam bahasa Inggeris *Memoir of Admiral Beaulieu's Voyage to East Indies* (1619-1622), bahawa Sultan Aceh adalah Raja pulau Sumatera yang tiada tandingannya, bukan hanya pantai dikuasainya tapi juga seluruh perniagaan di bawah kendalinya.⁴³

Aceh bukan hanya dikenal sebagai pusat perdagangan, bahkan ia terkenal sebagai penghasil lada terbesar,⁴⁴ terdapat kira-kira 75 km dari Trumon sampai Daya disebut sebagai *the pepper coast* di bahagian Utara dan sebagai penghasil pinang yang disebut *the betel nut coast* di bahagian Timur. Selain itu, Aceh juga menghasilkan emas dan bijih timah sendiri. Hasil-hasil ini dieksport ke Eropah seperti Salem, Boston, Baltimore, Philadelphia, New York, India, Turki, Arab, Parsi, China dan lain-lain. Harga eksport lada ketika itu rata-rata 4.7 sen U\$ per poun. Adapun barang-barang yang diimport oleh Aceh seperti ubat-ubatan, teh, kain, tembikar, minyak wangi dan barang perhiasan.

Selain itu, Aceh juga dikenal sebagai pengumpul hasil-hasil pulau Sumatera dan Semenanjung Tanah Melayu seperti emas di bahagian Sumatera, lada hitam di Kedah, dan bijih timah di Perak yang merupakan pusat galian bijih timah terbesar dunia ketika itu. Dengan menguasai sektor ekonomi dan perdagangan Aceh bangkit sebagai kuasa ekonomi di Nusantara.

⁴³ Denny Lombard (1986), *Kerajaan Aceh Zaman Iskandar Muda (1607-1636)*, (terj) Winarsih Arifin. Jakarta: Balai Pustaka, h. 132.

⁴⁴ Aboe Bakar (1987), *Kekayaan Atjeh* (terj). Amsterdam: Atjeh Instituut, h. 2.

iv. Pusat Ilmu Pengetahuan dan Pendidikan

Setelah dibincangkan bahawa agama dan politik menjadi faktor kepada kemajuan kerajaan Aceh Darussalam. Kedua-duanya tidak dapat bertahan lama kalau pendidikan dan ilmu pengetahuan rakyatnya tidak berkualiti. Pada masa pemerintahan Sultan Iskandar Muda (1607-1636) Aceh menjadi pusat universiti bertaraf antarabangsa, di mana sekurang-kurangnya 16 fakulti yang dikenali dengan "Dar" beroperasi di masjid Baitur Rahman.⁴⁵

Pelbagai disiplin ilmu pengetahuan disediakan di situ. Para mahasiswa yang datang bukan hanya anak tempatan Nusantara, tetapi juga pelajar-pelajar luar negeri turut menimba ilmu pengetahuan di Aceh. Selain ulama' besar tempatan seperti Syiekh Abdur Rauf al-Fansuri, Hamzah al-Fansuri, terdapat banyak ulama' dari luar negeri seperti Timur Tengah, Parsi, India menjadi tenaga pengajar di Aceh, selanjutnya mereka menjadi penduduk di sana.⁴⁶

Ulama'-ulama' begitu mendapat sambutan dan dihormati di Aceh. Kualiti pendidikan dan ilmu pengetahuan di Aceh menjadi faktor kepada perkembangan kerajaan Aceh Darussalam ketika itu. Ulama'-ulama' di Aceh telah memberikan sumbangan besar dalam perkembangan ilmu pengetahuan di Nusantara. Antaranya kitab *Turjumanul Mustafid*, *Sirāṭal Mustaqīm*, *Mir'atu Tullāb*. Kitab-

⁴⁵ Abdullah Ishak (1990), *op.cit.*, h. 117. Lihat, A. Hasyimi (1983), *Kebudayaan Aceh dalam Sejarah*. Jakarta: Penerbit Beuna, h. 79.

⁴⁶ *Ibid.* Lihat. Ismail Suny (1980), *Bunga Rampai Tentang Aceh*. Jakarta: Bhratara, h. 215-220.

kitab ini menjadi rujukan para generasi setelahnya bahkan sampai ke hari ini masih dibaca oleh masyarakat di Indonesia dan di Semenanjung Tanah Melayu.⁴⁷

Dengan sistem pendidikan yang mantap dalam berbagai disiplin ilmu dan lahirnya ulama'-ulama' besar, sarjana dan intelektual yang berkualitas serta karya-karya mereka yang menjadi khazanah Aceh, sehingga ia disebut sebagai pusat pendidikan dan ilmu pengetahuan. Banda Aceh di masa Sultan Iskandar Muda mendapat beberapa julukan, antaranya sebagai kota ilmu dan ulama', kota Dayah dan Universiti dan juga kota santri dan intelektual.

v. Semangat Patriotisme

Semangat patriotik sering dikaitkan dengan rasa kebangsaan yang tinggi. Ia sangat berbeza dengan maksud '*Asabiah*' atau lebih tepat disebut dengan rasa perkauman. '*Asabiah*' adalah rasa perkauman yang berpuak-puak atau fanatic kesukuan. Inilah yang dilarang dalam konsep Islam. Tetapi fanatic kepada Islam memang dituntut, sebab fanatic kepada agama ialah keyakinan seseorang terhadap agamanya. Sedangkan semangat patriotik yang dimaksudkan di sini ia lebih kepada rasa cinta kepada tanah air.

Tanah air adalah amanah. Maka cinta kepada tanah air adalah suatu kewajipan. Apalagi inti cinta kepada tanah air ialah berkonseptan kepada mempertahan negara Islam. Semangat patriotik inilah yang ditunjukkan oleh bangsa Aceh dalam melawan penjajah-penjajah yang melakukan ekspansi

⁴⁷ *Ibid.* Lihat. HAMKA (1993), "Aceh Serambi Mekkah", dalam A. Hasyimi *et al.* (ed) (1993), *Sejarah Masuk Dan Berkembangnya Islam Di Indonesia*, h. 221-228.

terhadap kedaulatan Aceh. Semangat patriotik mereka tidak pernah pudar walau sudah berabad-abad lamanya.

Sepanjang abad Aceh dalam keadaan perang. Era kerajaan Perlak Aceh telah mula berperang menentang Sriwijaya. Masa kerajaan Pasai perang menentang Majapahit. Kerajaan Aceh Darussalam perang terpanjang menentang Portugis di Melaka. Seterusnya perang terdahsyat melawan Belanda, diikuti perang dengan Jepun. Antony Reid dalam bukunya *The Contest For North Sumatera* mengatakan bahwa Aceh dalam menentang Portugis memperlihat dua segi perlawanan iaitu patriotisma dan ketaatan beragama.⁴⁸

Dalam hal ini perlu ditegaskan bahawa patriotisme yang ditunjukkan oleh mereka bukan patriotisme kesukuan sebagai mana yang didakwa oleh sebahagian ahli sejarah. Tetapi patriotisme yang berdasarkan cinta agama dan cinta tanah air. Dengan patriotisme yang tinggi itulah mereka dapat mempertahankan kedaulatan negara dan menjadi faktor kepada kejayaan kerajaan. Kerana rasa kebangsaan dan cinta tanah air merupakan identiti sebuah bangsa. Tanpa ada rasa patriotik bererti dia sudah hilang identitinya sebagai individu sebuah bangsa.

vi. Adat Istiadat

Adapun faktor berikutnya yang menjadi pendorong kepada kemajuan kerajaan Aceh Darussalam ialah adat istiadat. Adat biasanya diertikan dengan kebiasaan masyarakat. Adat seperti ini dapat berubah mengikut perubahan

⁴⁸ Anthony Reid (1968), *op.cit.*

masyarakat setempat dari masa ke semasa. Tetapi adat istiadat Aceh tidak hanya merupakan kebiasaan harian masyarakat, malah merupakan falsafah hidup dalam masyarakat dan kerajaan.

Lebih dari itu, adat istiadat Aceh disamakan dengan hukum *syara'*, sehingga ia tidak akan berubah meskipun perubahan status sosial masyarakat, sebab *syara'* tidak dapat diubah mengikut masyarakat. Sebaliknya sosial masyarakat Aceh selalu menyesuaikan diri dengan *syara'*. Ia telah menjadi falsafah dalam masyarakat bahawa adat bersendikan *syara'* dan *syara'* bersendikan adat.⁴⁹ Maksudnya adat istiadat tidak akan kuat sekiranya tidak bersumberkan *syara'*. Begitu juga dengan *syara'* tidak akan berjalan kalau tidak dijadikan adat.⁵⁰

HAMKA menulis, bahawa adat istiadat Aceh adalah hukum Islam. Pepatah Aceh mengatakan "hukom ngen adat lage zat ngen sifeit". Artinya hukum (*syara'*) dengan adat laksana zat dengan sifat, benda dengan bentuk. Ia tidak dapat diasingkan antara satu dengan yang lainnya. Dikuatkan lagi dengan sikap masyarakat Aceh yang menjaga adat istiadatnya. Dalam pepatah disebutkan "gadeuh aneuk meupat jrat, gadeuh adat hana pat mita".

Maksud pepatah tersebut ialah hilang anak dapat dijumpai kuburnya, tapi hilang adat tak dapat dicari gantinya. Ini petanda kentalnya hubungan adat istiadat dalam masyarakat Aceh, kadang-kadang mereka rela hilang anak kesayangannya daripada kehilangan adatnya. Yang lebih mengagumkan lagi bahawa adat istiadat

⁴⁹ HAMKA (Edisi Baru), *op.cit.*, h. 915.

⁵⁰ *Ibid.*

Aceh di bawah peranan Sultan dan Ulama. Masih sangat segar dalam hafalan masyarakat Aceh: *Adat bak po Temeurehom, Hukum bak Syiah Kuala, Kanun bak Putro Phang, Reusam bak Bentara*.⁵¹

Ungkapan pepatah di atas menggambarkan peranan Sultan dan ulama' serta tanggung jawab mereka terhadap adat istiadat dan hukum. Ia juga menunjukkan betapa sempurnanya peraturan-peraturan dalam masyarakat di Aceh. Dengan adat istiadat yang lengkap dan sempurna menurut ukuran zamannya menaikkan lagi perkembangan kerajaan Aceh Darussalam.

Faktor adat istiadat ini menjadi faktor kepada perkembangan dan kemajuan kerajaan Aceh Darussalam kerana ia menjadi falsafah hidup masyarakat. Sebuah bangsa tidak akan maju tanpa ada falsafah hidupnya. Oleh itu adat istiadat Aceh dijadikan salah satu bahagian dari inti aturan hidup rakyatnya. Dengan adat istiadat pula menjadi identiti kepada tamadun Aceh, apalagi ia bersumberkan hukum Islam dan di bawah naungan Raja-Raja Aceh.

vii. Kerjasama Antara Ulama' dan Pemerintah

Perpaduan ulama' dan umara di Aceh telah menjadi satu kekuatan dalam kemajuan Aceh. Ulama di Aceh bukan sahaja menjadi kiblat umat, tetapi juga sebagai penasihat Sultan. Mereka selalu berada bersama umara dalam keadaan apa jua.⁵² Sultan di Aceh bukanlah seorang Wali yang maksum yang harus dipuja, dia juga bukan seorang Dewa, tetapi Sultan ialah seorang Amir untuk umat. Dia

⁵¹ Zainuddin (1961), *Tarich Atjeh Dan Nusantara*, h. 313.

⁵² HAMKA (Edisi Baru), *op.cit.*

selalu menjadi contoh kepada rakyatnya. Maka apabila ia tidak menjadi teladan kepada rakyat, maka rakyat berhak menurunkannya.

Kaitan antara Sultan dan rakyat di Aceh berpedoman kepada falsafah” *Lā tā’ata li makhlūkin fi maksiatillāhī*”. Yang bermaksud tidak ada ketaatan terhadap makhluk dalam maksiat kepada Allah. Konsep ini menjadi pegangan bagi semua Sultan yang memerintah Aceh. Apabila dijumpai Sultan derhaka terhadap hukum Allah, maka ia akan diluputkan kedudukannya. Bahkan kalau dijumpai Sultan seorang yang zalim terhadap rakyat, maka tidak heran kalau ia dijatuhan hukum bunuh.

Sebelum Sultan Iskandar Muda ada Sultan yang dibunuh kerana ia sangat kejam dan zalim. Sebagai contoh Sultan Zainal ‘Abidin yang kejam dan bengis dibunuh pada tahun 1577 M.⁵³ Adapun peranan dan posisi ulama’ di Aceh selalu berdampingan dengan umara. Dalam hal ini dapat dilihat perpaduan ulama’ dan Sultan pada masa Sultan Iskandar Muda. Ulama’ menjadi penasihat baginya, sehingga beberapa Dewan Ulama’ didapati pada masanya. Antaranya *Balai Rong Sari*, *Balai Setia Ulama*, *Balai Himpunan Ulama*, *Balai Setia Hukama*.⁵⁴

Ulama’ dan umara dalam kemajuan kerajaan Aceh Darussalam, sama seperti dua sisi mata wang. Meskipun simbolnya berbeza, tetapi fungsinya satu. Kedua-dua mereka tak dapat dipisah-pisahkan. Apabila baik ulama’ dan umara maka baiklah umat ini. Sebaliknya jika ulama’ dan umara rosak maka rosaklah umat ini. Perpaduan ini, berlaku sampai ke pemerintahan para Ratu dan

⁵³ *Ibid*, h. 910.

⁵⁴ *Ibid*.

selanjutnya. Malah sampai ke hari ini kata-kata ulama' tetap menjadi kata putus dalam percaturan politik di Aceh. Tanpa dukungan ulama' pemerintahan di Aceh tidak akan jalan.⁵⁵

viii. Pemerintahan Yang Adil

Sebuah pemerintahan yang bersih dan adil merupakan harapan semua rakyat. Kerana dengan pemerintahan yang bersih dan adil akan mewujudkan nilai keadilan. Sikap adil dalam pemerintahan akan membawa kepada kesejateraan rakyat. Oleh yang demikian pemerintahan yang bersih menjadi faktor kepada perkembangan dan kemajuan kerajaan. Pada masa pemerintahan Sultan Iskandar Muda suatu pemerintahan yang adil dan bersih dapat ditegakkan.

Pemerintah yang bersih dan adil bermaksud tidak ada sebarang diskriminasi terhadap rakyat. Undang-undang dijalankan kepada setiap individu rakyat. Dengan kata lain tidak ada unsur pilih kasih dalam politik kerajaan. Tidak ada seorangpun yang kebal hukum. Di bawah undang-undang sama rata, apakah dia bangsawan ataupun rakyat jelata biasa, jika ia melanggar undang-undang tetap dikenakan tindakan mengikut undang-undang.

Ketegasan baginda Sultan Iskandar Muda membuktikan apabila baginda menjatuhkan hukuman mati kepada Puteranya Meurah Pupok yang dituduh melakukan zina dengan isteri salah seorang pengawal kerajaan.⁵⁶ Padahal Meurah

⁵⁵ Ibrahim Alfian (1975), *The Ulama in Acehnese Society: A Preliminary Observation*. Banda Aceh: Pusat Latihan dan Penelitian Ilmu-ilmu Sosial Aceh, h. 76.

⁵⁶ HAMKA (Edisi Baru), *Sejarah Umat Islam*, h. 922-924.

Pupok adalah satu-satunya Putera baginda yang sangat disayangi dan bakal menggantikannya. Tetapi kerana melakukan kesalahan, undang-undang tetap mengambil tindakan, iaitu hukuman mati. Semuanya sama di sisi undang-undang.

Pada masa Sultan Iskandar Muda, kerajaan Aceh Darussalam telah mempunyai sebuah Undang-undang negara yang disebut *Kanun Meukuta Alam al-Asyi*. Hukum yang berlaku dalam kerajaan ialah hukum Islam. Adapun sumber hukumnya ialah Al-Quran, Al-Hadis, Al-Ijma', Al-Qias. Kuasa politik dipegang oleh Sultan Malikul Adil dan hukum dipegang oleh Kadi Malikul Adil. Undang-undang ini tetap jadi pedoman bagi Sultan-sultan selanjutnya. Bahkan Raja Brunei Sultan Hasan dengan tegas menyatakan mengambil teladan *Kanun Meukuta Alam* di Aceh dalam menjalankan kerajaannya.⁵⁷

ix. Kebebasan

Meskipun sistem kerajaan Aceh Darussalam adalah sistem monarki, tetapi kebebasan bagi rakyatnya sama seperti sistem demokrasi. Sebahagian ahli sejarah mengatakan ia lebih baik dari sistem demokrasi, kerana Aceh Darussalam menganut sistem syura. Bahkan saat itu di Eropah sendiri belum berjalan demokrasi. Kebebasan yang dimaksudkan di sini tidak sebatas bebas dalam mengeluarkan pedapat di muka umum. Tetapi setiap rakyat berhak mendapat hak politik dan jaminan keamanan hidup.

⁵⁷ M. Said (1961), *Atjeh Sepanjang Abad*, h. 173-174.

Sistem politik Aceh Darussalam yang bebas ini menjadi tonggak kepada kemajuan kerajaan. Salah satu contoh yang sangat penting dibincang di sini ialah kepemimpinan wanita. Selama enam puluh tahun lebih Aceh berada di bawah pemerintahan para Ratu.⁵⁸ Di Aceh tidak ada diskriminasi antara kaum lelaki dan kaum perempuan. Keterlibatan wanita dalam politik kerajaan Aceh sudah dimulai sejak kerajaan Perlak lagi, di mana Puteri Nurul 'Ala menjabat menteri kewangan kerajaan.⁵⁹

Pada masa Sultan Iskandar Muda, yang menjadi panglima angakatan laut wanita ialah Laksama Keumalahayati.⁶⁰ Ketua badan perisiknya dijabat oleh Cut Leipah.⁶¹ Ketika perang Belanda, sebaris nama-nama pejuang wanita tercatat seperti Cut Nyak Dhien, Cut Metia dan lain-lain. Fenomena ini menunjukkan kerajaan tidak menjalankan unsur diskriminasi terhadap perempuan. Kemampuan mereka diakui dan dihormati. Namun yang harus dicatat bahawa semua kepemimpinan wanita di Aceh selalu didampingi oleh para ulama'.

x. Kesejahteraan

Matlamat terakhir bagi sebuah kehidupan ialah mencari kesejahteraan hidup. Dengan kesejahteraan semua aspek dan objektif politik kerajaan dapat berjalan dengan baik. Kesejahteraan adalah kekuatan. Banyak penulis telah

⁵⁸ *Ibid.*, h. 191-215.

⁵⁹ Arifin Amin (1980), *Uraian Sekitar Kerajaan Islam Peureulak Aceh Timur.*, h. 49-56.

⁶⁰ Yunus Djamil (1968), *op.cit.*, h. 45. Lihat, Tuanku Abdul Jalil (1993), "Kerajaan Islam Perlak Poros Aceh-Demak-Ternate, Siapa Laksamana Keumalahayati" dalam A. Hasyimi et al. (ed), *op.cit.*, h. 274-277. Keumalahayati memiliki 100 buah kapal perang, dan setiap satu kapal memiliki 400 perajurit wanita lengkap dengan sejanta.

⁶¹ Ibrahimy (1993), *op.cit.*, h. 4.

menggambarkan tentang kehidupan rakyat kerajaan Aceh Darussalam. Rata-rata penulis menyebutkan bahawa rakyat Aceh pada masa kebesarannya hidup dalam keadaan sejahtera. Puncaknya ialah masa Sultan Iskandar Muda, di mana faktor agama, politik, ekonomi dan pendidikan telah membuat rakyatnya hidup dengan sejahtera. Di sinilah lahirnya negara yang kuat.

Kekuatan sebuah kuasa politik tidak mesti dia memiliki negara yang besar dan penduduk yang banyak. Untuk apa memiliki negara yang besar kalau melakukan diskriminasi. Untuk apa penduduk begitu banyak kalau kehidupan mereka sengsara. Meskipun sebuah kuasa politik tidak seberapa besar tetapi mencukupi syarat, ia akan menjadi negara kuat. Dapat dikatakan bahawa kuatnya sebuah kerajaan terletak pada tingkat kesejahteraan rakyatnya. Satu negara yang kecil yang aman damai lebih baik berbanding daripada sebuah negara besar tetapi hidup sengsara.

4.4. Faktor Kemerosotan Kerajaan Aceh Darussalam

Sebagai mana dijelaskan dalam kamus Dewan⁶² kemerosotan membawa maksud keadaan yang merosot atau menurun. Kemerosotan itu sendiri mesti disebabkan oleh beberapa faktor. Mengikut analisis terhadap data-data yang lalu, didapati beberapa faktor penting yang menjadi penyebab kepada kemerosotan kerajaan Aceh Darussalam. Antaranya sebagai berikut:

⁶² Kamus Dewan (2000), Edisi III. Kuala Lumpur: Dewan Bahasa & Pustaka, h. 1149-1150.

- a. Perebutan Kuasa
- b. Peperangan
- c. Pudar Semangat Kebangsaan
- d. Perselisihan
- e. Pemimpin Kurang Berwibawa

i. Perebutan Kuasa

Kuasa dan jabatan adalah dua perkara yang selalu menjadi rebutan ramai. Banyak peristiwa sejarah berlaku tentang perebutan kuasa. Berlaku revolusi misalnya kerana ingin mendapat kuasa. Revolusi juga salah satu jalan untuk menggulingkan pemimpin dan kerajaan, seperti revolusi Iran yang terjadi pada tahun 1971. Kadang-kadang proses perebutan kuasa dapat merubah keadaan yang lebih baik. Tetapi kebanyakan peristiwa perebutan kuasa menyebabkan kemerosotan kerajaan.

Apapun sistem pemerintahan samada monarki atau demokrasi, perebutan kuasa adalah konflik politik yang jika berkepanjangan akan menjatuhkan kerajaan. Peristiwa perebutan kuasa antara pembesar-pembesar kerajaan Aceh telah menyebabkan politik kerajaan tidak menentu. Ini berlaku sebaik sahaja meninggalnya Sultan Iskandar Thani 1641.

Tahta kerajaan setelah baginda meniggal dunia diperintah oleh para Ratu. Kepemimpinan wanita ini ditentang hebat oleh sebahagian ulama' di Aceh. Dengan itu terjadilah kelompok pro dan kontra antara pembesar-pembesar

kerajaan. Kontraversi ini telah memberi kesan negatif kepada pemerintahan kerajaan Aceh Darussalam sehingga banyak wilayah di bawah kuasa Aceh melepaskan diri.⁶³

Hal yang sama berlaku ketika pemerintahan Sultan Jamalul 'Alam Badrul Munir bin Syarif Hasyim (1115-1139H/1703-1726M) Sultan ke 31, terjadi penentangan daripada Panglima Sagi kerajaan yang tidak senang dengan Sultan.⁶⁴ Begitu juga pada masa pemerintahan Sultan Alaiddin Mahmud Syah (1174-1195 H/1760-1781 M) Sultan ke 35, terjadi dua kali rampasan kuasa, pertama dilakukan oleh pembesar kerajaan iaitu Maharaja Leboey, kedua dilakukan oleh Raja Udah Nalila Sulaiman.⁶⁵ Meskipun kedua-dua pemberotakan itu dapat dipatahkan namun telah meninggalkan kesan yang negatif kepada perjalanan politik kerajaan Aceh Darussalam.

Oleh yang demikian yang menjadi punca kelemahan Aceh pada waktu itu bukanlah semata kerana yang menjadi pemerintah adalah wanita, tetapi disebabkan perebutan kuasa antara mereka. Buktinya pemerintahan wanita di Aceh bertahan 60 tahun lebih. Satu lagi kerajaan yang diperintah oleh wanita waktu itu iaitu Inggeris. Namun tetap maju dan berkembang, rakyat hidup dalam keadaan aman dan sejahtera. Ini disebabkan seluruh rakyat Inggeris menyokong kepemimpinannya, kerana tujuan utama pemimpin ialah membawa kemaslahatan kepada rakyat.

⁶³ Yunus Djamil (1968), *op.cit.*, h. 46-48. Lihat. M.Said (1961), *op.cit.*, h. 191-215.

⁶⁴ Yunus Djamil (1968), *Tawarich Raja-raja Kerajaan Atjeh*, h. 49.

⁶⁵ *Ibid.*, h. 50-51.

ii. Peperangan

Peperangan bermakna suatu penghancuran. Peperangan juga bertujuan penaklukan dan penjajahan. Tidak seorangpun yang menginginkan perang berlaku, kerana perang sama dengan pembunuhan, pembasmian dan juga penghapusan tamadun manusia. Meskipun pada waktu tertentu dituntut untuk berperang membela diri dan mempertahankan tanah air. Terlepas dari ketentuan hukum apapun, yang namanya perang adalah pemusnahan yang melanggar dengan etika kemanusiaan.

Memang semangat juang rakyat Aceh terkenal dalam sejarah. Mereka telah berperang dengan kolonialis Portugis hampir seabad, seterusnya perang dengan Belanda, diikuti perang dengan Jepun. Tidak ada satupun penjajah yang mampu menaklukkan Aceh dan tak pernah menyerah kalah kepada musuh. Bahkan sampai ke hari ini mereka masih berperang. Peperangan demi peperangan yang begitu panjang telah menyebabkan kuasa Aceh merosot.⁶⁶ Bukan hanya sekadar itu, malah kedaulatannya pun pada hari ini sudah tergadai.⁶⁷

iii. Pudar Semangat Kebangsaan

Sebuah kebangsaan mempunyai negara, rakyat dan bahasa. Sebagai telah dijelaskan tanah air suatu bangsa adalah amanah. Menjaga amanah adalah wajib. Seandainya ia bukan merupakan suatu kewajipan, sungguh tidak wajib

⁶⁶ Anthony Reid (1987), *Perjuang Rakyat: Revolusi dan Hancurnya Kerajaan di Sumatera*, (terj). Jakarta: Pustaka Sinar Harapan, h. 31-36.

⁶⁷ Ibrahim Alfian (1997), *Perang Kolonial Belanda di Aceh*. Banda Aceh: Pusat Dokumentasi dan Informasi Aceh, h. 53.

menubuhkan sebuah negara Islam. Seterusnya kalau sudah menjadi satu kewajipan tidak mungkin tidak wajib dijaga. Kerana salah satu ciri penting menjaga amanah tersebut ialah semangat kebangsaan.

Justeru demikian sangat jelas bahawa apabila rakyat sebuah kerajaan hilang semangat kebangsaannya, maka ia akan menjadi salah satu faktor penyebab kemerosotan sebuah kerajaan. Ini kerana rakyat tersebut telah hilang identiti sebagai bangsa. Kalau identitinya hilang tanggung jawab ke atas kerajaan tidak ada. Jadi rakyat yang tidak ada tanggungjawab akan membawa malapetaka bagi kerajaan. Dan ini akan menjadi faktor kemerosotan bahkan kejatuhan.

Akibat seperti itu, menjadi kenyataan apabila kedaulatan Aceh hilang begitu sahaja. Ini kerana rakyat Aceh waktu itu tidak lagi mengutamakan nilai kebangsaannya. Konsep Islam dalam dada mereka hanya sebatas iman dan ibadat semata, mereka lupa bahawa mempertahankan kedaulatan kerajaan Islam merupakan bahagian dari Islam juga. Dengan demikian, setelah tahun 1939 kedaulatan Aceh tergadai kepada orang lain. Jika kedaulatan jatuh ke tangan orang lain, maka rakyat Aceh sudah kehilangan identitinya.

Bertitik tolak dari pudarnya semangat kebangsaan mereka, seluruh tata kehidupan rakyat Aceh yang satu ketika dahulu sebagai satu bangsa yang bermaruah digantikan sertamerta. Meskipun tidak ditukar agama, namun ia tidak boleh lagi wujud seperti yang telah sedia ada. Politik, ekonomi, kebudayaan, bahkan sistem pendidikan bertukar dengan sesuatu yang baru. Puncanya adalah kerena rakyat Aceh sudah hilang semangat kebangsaannya.

iv. Perselisihan

Terkenal dalam catatan sejarah bahawa kerajaan Aceh Darussalam dalam usahanya mengusir Portugis dari Nusantara telah berperang dengan Portugis dalam masa yang cukup lama. Suatu peristiwa besar terjadi pada masa Sultan Iskandar Muda iaitu serangan besar-besaran dilancarkan ke Melaka untuk merebut benteng terkenal Portugis iaitu benteng “*A Famosa*”. Hamka menulis dalam bukunya *Sejarah Umat Islam*, tentang serangan itu yang melibatkan armada angkatan laut Aceh yang cukup besar.⁶⁸

Menurutnya 320 buah kapal tentara laut Aceh dan 40.000 pasukannya digunakan untuk menyerang kubu Portugis di Melaka.⁶⁹ Serangan ini telah dikalahkan dengan teruknya. Ini kerana Portugis mendapat bantuan Goa, Johor, Pahang, Patani yang bekerjasama dengan Portugis.⁷⁰ Punca kekalahan ini, bukan semata kerana Portugis telah mendapat bantuan sekutunya, tapi di dalam kepemimpinan angkatan laut Aceh terdapat perselisihan pendapat.⁷¹

Laksamana menghendaki pendaratan dan serangan segera dilancarkan. Tetapi perajurit menghendaki pendaratan dan serangan yang bertahap. Tujuannya agar Portugis menyerah kalah sebelum bantuan sekutunya datang. Namun ketika angkatan laut Aceh menyerbu, tembakan meriam dari benteng *A` Famosa* diarahkan ke arah tentera laut Aceh. Kapal perang Portugis dari Goa, Lisbon juga

⁶⁸ HAMKA (Edisi Baru), *op.cit.*, h. 920.

⁶⁹ *Ibid.*

⁷⁰ *Ibid.*

⁷¹ *Ibid.*

tiba ke selat Melaka.⁷² Angkatan laut Aceh terkepung. Akhirnya banyak kapal perang Aceh musnah, hanya sebahagian dapat kembali ke Aceh.

Dari huraian ini, jelas bahawa perselisihan pendapat antara Laksamana dan perajuritnya dalam situasi perang telah menyebabkan kekalahan yang menyakitkan. Kerana setelah peristiwa tersebut angkatan laut Aceh telah menurun. Maka perselisihan pendapat merupakan salah satu penyebab kemerosotan kuasa angkatan laut Aceh. Jika perselisihan pendapat itu tidak terjadi, mungkin peristiwa sejarah di selat Melaka tidak demikian.

Dalam keadaan di medan perang menentang musuh, Islam sangat melarang wujudnya perselisihan pendapat, kerana dengan perselisihan itu akan melemahkan taktik peperangan sekeligus menurunkan semangat juang para pejuang. Kalau itu terjadi, ia menghancurkan cita-cita sebuah perjuangan. Quran menjelaskan pada Surah al-Anfal sebagai berikut:

وَلَا تَنْأِيْعُوا فَتَنْهَيْنُّوْا وَتَنْهَيْبَ رِبْحَكُمْ

Maksudnya: janganlah kamu berbantah-bantahan, yang menyebabkan kamu menjadi gentar dan hilang kekuatanmu

Terjemahan Surah al-Anfal (8):46.⁷³

⁷² Ibid.

⁷³ Jabatan Kemajuan Islam Malaysia (2000), *Tafsir Pimpinan Ar-Rahman Kepada Pengertian Al Quran (30) Juz*, Cet. 13. Kuala Lumpur: Dārul Fikir, h. 333.

v. Pemimpin Kurang Wibawa

Peranan seorang pemimpin dalam sebuah kerajaan sangat menentukan. Pemimpin yang memiliki peranan ialah pemimpin yang berwibawa. Maka wibawa seorang Sultan merupakan dorongan kepada perkembangan sebuah kerajaan. Sebaliknya apabila Sultan tidak berwibawa resikonya adalah membawa kepada kemerosotan kerajaan. Wibawa adalah kekuatan seseorang pemimpin. Jika pemimpin dihormati oleh rakyat, maka akan wujud sebuah kerajaan yang bermaruah dan bermartabat.

Fakta sejarah seperti ini terjadi pada masa pemerintahan Sultan Mahmud Syah. Beliau naik tahta pada tahun 1870 M. Ketika itu, dalam kerajaan sedang terjadi perebutan kuasa antara pembesar-pembesar kerajaan. Selain persengketaan dalam yang semakin terbuka itu, Aceh juga dalam keadaan menghadapi agresi Belanda. Yang sangat penting dalam kondisi seperti ini ialah menyelesaikan konflik dalaman. Namun ia tidak mampu untuk diselesaikan, ini kerana Sultan yang masih muda baru berusia 16 tahun tidak memiliki kewibawaan yang cukup untuk menyelesaikannya.⁷⁴

Sebelum itu, dalam kerajaan Aceh Darussalam juga sudah terjadi pengangkatan Sultan yang masih di bawah umur, seperti pertabalan Sultan Muda bin Sultan Husen Syah, Sultan ke 15, bahkan menurut sejarah beliau dilantik menjadi Sultan pada usia 7 bulan setelah mangkat ayahandanya.⁷⁵ Begitu juga

⁷⁴ Zulhendri Abdullah (2001), *Internal Conflict and State Making: Falisme Dunia Ketiga?*. Jakarta: t.p, h. 352-383.

⁷⁵ M. Yunus Djamil (1968), *op.cit.*, h. 43.

dengan pengangkatan Sultan Sulaiman Ali Alaiddin Iskandar Syah (m.1273H/1857M) Sultan ke 39,⁷⁶ Baginda masih terlalu muda dan tidak ada wibawa, sementara kerajaan dalam keadaan tidak stabil.

Kerana Sultan yang masih muda dan tidak memiliki kewibawaan dalam politik dan pemerintahan, menyebabkan pertahanan kerajaan melemah. Apalagi peristiwa tersebut berlaku selari dengan ancaman pihak asing. Ini menjadi kesempatan kepada pihak musuh untuk menceroboh setiap pertahanan negara. Musuh-musuh Aceh saat itu, sangat gembira apabila yang menjadi Sultan hanya seorang anak muda yang tidak memberi pengaruh apa-apa dalam kerajaan.

Menurut konsep Islam tidak sah pengangkatan seorang pemimpin yang masih di bawah umur atau anak kecil.⁷⁷ Islam jauh sebelumnya telah meletakkan syarat seorang pemimpin adalah baligh. Malah syarat baligh termasuk dalam syarat-syarat asasi untuk menjadi seorang pemimpin.⁷⁸ Sementara Taqiyuddin An-Nabhani dalam bukunya *Sistem Pemerintahan Islam* menyebut, tidak boleh anak-anak diangkat menjadi pemimpin.⁷⁹

Pengangkatan anak kecil sebagai Sultan akan melahirkan sebuah kerajaan yang tidak bermaruah. Ini kerana anak yang masih belum baligh tidak memiliki tanggung jawab, tidak adil dan belum dibebankan hukum ke atasnya. Oleh yang

⁷⁶ *Ibid.*, h. 52.

⁷⁷ Imam Marwadi (2000), *Al-Ahkam As-Sulthaniyyah: Prinsip-prinsip Penyelenggaraan Negara Islam (terj)*. Jakarta: Darul Falah, Penerbit Bunkum Islam Kaffah, h. 14-15.

⁷⁸ Syauqi Abu Khalil (1993), *Al-Hadarah al-'Arabiyyah al-Islamiyyah*. Libia: Kulliah al-Dakwah al-Islamiyyah, h. 140.

⁷⁹ Taqiyuddin An-Nabhani (1997), *Sistem Pemerintahan Islam: Doktrin, Sejarah Dan Realitas Empirik*. Jakarta: Penerbit Al-Izzah Khazanah Tsaqafah Islam, h. 68-69.

demikian melantik anak yang masih kecil sebagai Sultan dalam kerajaan Aceh Darussalam sama dengan menyerahkan sesuatu kepada yang tidak berhak Memberikan hak kepada yang tidak berhak akan membawa kepada kehancuran.

Dapat dibuat kesimpulan daripada hurain di atas, bahawa dalam sebuah kerajaan yang menjadi faktor kepada perkembangan dan kemajuan lebih banyak berbanding dengan faktor yang menyebabkan kepada kemerosotannya. Sebuah kerajaan mencapai puncak kebesarannya seperti kerajaan Aceh Darussalam telah melalui proses permulaan, perkembangan hingga puncak kejayaan.

Namun kebesaran itu lenyap hanya dengan disebabkan beberapa faktor sahaja. Faktor yang lebih cepat memberi pengaruh kepada kemerosotan kerajaan ialah krisis politik dan ekonomi. Kerana kedua-dua faktor ini merupakan tulang belakang kemajuan sebuah kerajaan. Politik yang tak stabil dan kemelesetan ekonomi ditambah lagi dengan pemimpin yang kurang berwibawa serta kesan perperangan ke atasnya mempercepat lagi kepada kejatuhan kerajaan.

Analisis ini berdasarkan kepada fenomena peristiwa sejarah yang telah berlalu berkaitan dengan naik dan tenggelamnya kerajaan Aceh Darussalam. Dengan ini akan memberikan jawapan yang cukup kepada soalan apakah faktor sehingga kerajaan yang agung suatu ketika dahulu mengalami kemunduran dan kejatuhan, dan sampai sekarang ia belum dapat dikembalikan seperti dahulu.